



XALQ DEPUTATLARI QASHQADARYO VILOYAT KENGASHI Q A R O R I

2022 - yil 2 - iyun

VI-47-103-4-0-K/22

Qashqadaryo viloyati hokimligi

Qashqadaryo viloyati Ko'kdala tumanining 2022-yilgi mahalliy budjetini tasdiqlash to'g'risida

O'zbekiston Respublikasi "Mahalliy davlat hokimiyati to'g'risida"gi Qonunning 6 va 24-moddalari, "2022-yil uchun O'zbekiston Respublikasining Davlat budjeti to'g'risida"gi Qonuniga muvofiq hamda O'zbekiston Respublikasi Oliy Majlisi Senatining 2022-yil 17-martdagi "Qashqadaryo viloyati Chiroqchi tumanining chegaralarini o'zgartirish va Ko'kdala tumanini tashkil etish to'g'risida"gi SQ-503-IV-son qarori va O'zbekiston Respublikasi Prezidentining "Qashqadaryo viloyati tarkibida Ko'kdala tumanini tashkil etish bilan bog'liq tashkiliy masalalarini hal etish chora-tadbirlari to'g'risida" 2022-yil 19-apreldagi PQ-211-son qarorini inobatga olib, xalq deputatlari Qashqadaryo viloyati Kengashi

QAROR QILADI:

1. O'zbekiston Respublikasi Prezidentining "Qashqadaryo viloyati tarkibida Ko'kdala tumanini tashkil etish bilan bog'liq tashkiliy masalalarini hal etish chora-tadbirlari to'g'risida" 2022-yil 19-apreldagi PQ-211-son qarori ijro va ma'lumot uchun qabul qilinsin.
2. 2022-yil uchun Ko'kdala tuman mahalliy budjetining daromadlari va xarajatlarining prognozi [1-ilovaga](#) muvofiq tasdiqlansin.
3. 2022-yil uchun Ko'kdala tuman budjetiga umumdavlat soliqlaridan ajratmalar normativlari [2-ilovaga](#) muvofiq tasdiqlansin.

Bunda, ajratmalar normativlari bo'yicha Ko'kdala tuman mahalliy budjetining taqsimotini o'rnatilgan tartibda Qashqadaryo viloyati bo'yicha G'aznachilik boshqarmasi tomonidan amalga oshirilishi belgilab qo'yilsin.

4. 2022-yil uchun viloyat budjetidan Ko'kdala tuman mahalliy budjetiga ajratiladigan tartibga soluvchi budjetlararo transfertlar miqdorlari [3-ilovaga](#) muvofiq tasdiqlansin.

Bunda, tartibga soluvchi budjetlararo transfertlar miqdorini tuman mahalliy budjeti daromadlari prognozi ijrosidan qat'iy nazar kamaytirishga yo'l qo'yilmasligi O'zbekiston Respublikasining "2022-yil uchun O'zbekiston Respublikasining Davlat budjeti to'g'risida"gi Qonunda belgilab qo'yilganligi ma'lumot uchun qabul qilinsin.

5. Tuman budjetining 2022-yil uchun zaxira jamg'armalari tegishli budjetlar tasdiqlangan umumiy xarajatlarning kamida 1 foizi miqdorida shakllantirilsin.

Qashqadaryo viloyati Ko'kdala tuman budjetini ijro etishda yuqori turuvchi budjetdan ularga ajratiladigan budjetlararo transfertlarning prognozidan oshgan qismi uchun tegishli budjetlarining zahira jamg'armalar miqdorlariga aniqlashtirish kiritilmaydi.

6. 2022-yil uchun tuman budjeti shaxsiy g'azna hisob varaqlarida turgan budjet mablag'larining yo'l qo'yiladigan eng kam miqdori [4-ilovaga](#) muvofiq belgilansin.

7. Mazkur qarorning 1, 3 va 4-ilovalardagi ajratilayotgan mablag'lar Xalq deputatlari Qashqadaryo viloyati Kengashining 2022-yil 12-yanvardagi "Qashqadaryo viloyatining 2022-yilgi mahalliy budjeti parametrlarini tasdiqlash" to'g'risidagi VI-38-3-4-0-K/22-sonli qaroriga muvofiq tasdiqlangan Chiroqchi tuman mahalliy budjet mablag'lari hisobidan kamaytirilishi inobatga olinsin.

Shuningdek, O'zbekiston Respublikasi Prezidentining 2021-yil 5-martdagi "Xotin-qizlarni qo'llab-quvvatlash, ularning jamiyat hayotidagi faol ishtirokini ta'minlash tizimini yanada takomillashtirish chora-tadbirlari to'g'risida"gi PQ-5020-son qaroriga asosan «Ayollar daftari»ga ro'yxatlar mahalla fuqarolar yig'inlar tomonidan kiritilishini hisobga olgan holda, Chiroqchi tumanida «Ayollar daftari»ga kiritilgan xotin-qizlarni qo'llab-quvvatlash jamg'armasiga shakllangan mablag'lar hisobidan Ko'kdala tuman «Ayollar daftari»ga kiritilgan xotin-qizlarni qo'llab-quvvatlash jamg'armasiga 670.4 mln.so'm mablag' o'tkazib berilsin.

8. O‘zbekiston Respublikasining “2022-yil uchun O‘zbekiston Respublikasining Davlat budjeti to‘g‘risida”gi Qonuni bilan 2022-yilda xalq deputatlari Kengashlarini mahalliy budjetlarni boshqarishda, xususan mahalliy budjet xarajatlarini hududiy budjet mablag‘lari taqsimlovchilar kesimida tasdiqlash va ularning Kengash oldidagi hisobdorligini belgilash bo‘yicha vakolatlari kengaytirilganligi inobatga olinsin.

Shuningdek, 2022 yilda quyidagi soliq turlari:

a) tuman budjetiga to‘liq hajmda o‘tkaziladi:

jismoniy shaxslardan olinadigan mol-mulk solig‘i;

jismoniy shaxslardan olinadigan yer solig‘i;

jismoniy shaxslarga tegishli mol-mulkni ijaraga berishdan oladigan yillik daromadi to‘g‘risidagi deklaratsiyaga asosan to‘laydigan, shuningdek yakka tartibdagi tadbirkorlar to‘laydigan jismoniy shaxslardan olinadigan daromad solig‘i;

aylanmadan olinadigan soliq;

qonunchilikda belgilangan miqdorlarda O‘zbekiston Respublikasining Davlat budjetiga undiriladigan boshqa yig‘imlar (bojxona organlari tomonidan undiriladigan yig‘imlardan, g‘ildirakli transport vositalari, o‘ziyurar mashinalar va ularning tirkamalari uchun undiriladigan utilizatsiya yig‘imidan, shuningdek avtotransport vositalari oynalarining tusini o‘zgartirishga (qoraytirishga) ruxsatnoma berish uchun to‘lovdan tashqari);

suv resurslaridan foydalanganlik uchun soliq, bundan elektr stansiyalari tomonidan to‘lanadigan soliq mustasno;

ay rim turdagi tovarlarning chakana savdosiga doir huquq uchun yig‘imlar;

qurilish materiallari bo‘yicha yer qa‘ridan foydalanganlik uchun soliq.

b) viloyatning viloyat mahalliy budjetiga to‘liq hajmda o‘tkaziladi:

yuridik shaxslarning mol-mulkiga solinadigan soliq;

yuridik shaxslardan olinadigan yer solig‘i;

elektr stansiyalari tomonidan to‘lanadigan suv resurslaridan foydalanganlik uchun soliq;

benzinni, dizel yoqilg'isini va gazni yakuniy iste'molchilarga realizatsiya qilishdagi aksiz solig'i;

qonunchilikda belgilangan miqdorlardagi davlat bojlari (patent bojlaridan va litsenziyalar berganlik uchun davlat bojlaridan tashqari);

qonunchilikda belgilangan miqdorlarda O'zbekiston Respublikasining Davlat budgetiga undiriladigan jarimalar;

qonunchilikda belgilangan miqdorlarda davlat daromadiga o'tkazilgan mulkni realizatsiya qilishdan tushgan tushumlar, mahalliy davlat hokimiyati organlarining ulushi bo'yicha dividendlar (daromadlar) va ajratmalar;

davlat aktivlarini joylashtirishdan, foydalanishga (ijaraga) berishdan va sotishdan qonunchilikda belgilangan normativlar bo'yicha olingan daromadlar;

xususiylashtirishdan tushgan tushumlar va boshqa soliqlar;

v) viloyat budgeti hamda tuman budgeti o'rtasida taqsimlanadi:

jismoniy shaxslardan olinadigan daromad solig'i;

9. Viloyat hokimining birinchi o'rinbosari (A.Qodirov), Moliya bosh boshqarmasi (F.Yusupov), Davlat soliq boshqarmasi (Sh.Nisbatxonov) tuman hokimligi va mas'ul boshqarma va tashkilotlar bilan birgalikda:

tegishli budgetlarni birinchi navbatda ish haqi va unga tenglashtirilgan to'lovlar, oziq-ovqat va dori-darmon hamda kommunal xizmatlar xarajatlarining rejalashtirilishini nazarda tutgan holda shakllantirish;

mahalliy budgeti prognoz ko'rsatkichlarni o'z vaqtida va samarali bajarish;

budget mablag'laridan maqsadli va samarali foydalanish;

budget intizomiga rioya etilishi ustidan nazorat va mas'uliyatni yanada kuchaytirish;

tegishli mahalliy budgetlarga soliqlar va boshqa majburiy to'lovlarning to'liq tushumini ta'minlash;

budget daromadlar bazasini oshirish va qo'shimcha rezervlarni aniqlash zarurligiga alohida e'tibor qaratsin.

10. Viloyat davlat soliq boshqarmasi (Sh.Nisbatxonov) Davlat soliq inspeksiyalari bilan birgalikda O'zbekiston Respublikasi Soliq kodeksida

belgilangan vakolatlaridan kelib chiqib:

solliqlarning to‘liq va to‘g‘ri hisoblanishini hamda ushbu solliqlarni o‘z vaqtida budjetga undirilishi ustidan soliq nazoratini kuchaytirish;

yer solig‘i, suv resurslaridan foydalanganlik uchun soliq va mol-mulk solliqlari bo‘yicha doimiy tahlillar o‘tkazgan holda, solliqlarni to‘liq hisoblanishini ta‘minlash hamda ushbu soliq to‘lovlari bo‘yicha soliq qarzdorligiga yo‘l qo‘ymaslik choralari ko‘rish;

aylanmadan soliq turi bo‘yicha soliq to‘lovchilar tomonidan naqd pul aylanmalarining soliq hisobotlarida to‘liq aks ettirilishi ustidan doimiy soliq nazoratini o‘rnatish hamda zarur hollarda xronometraj va kameral soliq nazorati tadbirlarini o‘tkazish;

Bunda, mazkur yo‘nalishda jamoatchilik nazoratini kuchaytirish maqsadida fuqarolarga xarid chekini talab qilib olishni targ‘ib etuvchi ijtimoiy roliklar hamda video materiallar tayyorlab, ijtimoiy tarmoqlar va ommaviy axborot vositalarida keng targ‘ibot-tashviqot ishlarini olib borishga alohida e‘tibor qaratsinlar.

xatlov ishlarini samarali tashkil etish orqali yer va mol-mulk solig‘ining soliq bazasini oshirish vazifasi yuklatilsin.

11. Viloyat davlat soliq boshqarmasi (Sh.Nisbatxonov), Davlat Kadastrlar palatasi viloyat boshqarmasi (G‘.Xamrayev) 2022-yildan boshlab yuridik shaslar mol-mulk solig‘ini hisoblashda ko‘chmas mulklarga 1 kv.metr uchun minimal miqdorlar joriy etilganligidan kelib chiqib, viloyatda mavjud soliq to‘lovchilarning mol-mulklari maydonlarini chuqur tahlil etgan holda ushbu mol-mulklarga nisbatan solliqlarni to‘liq hisoblanishini ta‘minlasin.

12. Viloyat davlat soliq boshqarmasi (Sh.Nisbatxonov), Kon-geologiya faoliyatini nazorat qilish mintaqaviy inspeksiyasi hamda tuman hokimligi bilan birgalikda:

noruda qurilish materiallarini qazib olish sohasida noqonuniy faoliyat olib borayotgan karerlarni aniqlash bo‘yicha xatlovlar o‘tkazish;

xatlov natijalari bo‘yicha aniqlangan noqonuniy faoliyat olib borayotgan karerlar faoliyatini qonuniylashtirish hamda ularni soliq bazasiga qamrab olish;

noruda qurilish materiallarini qazib olish sohasida faoliyat olib borayotgan karerlar tomonidan qazib olinayotgan noruda qurilish materiallar hajmining soliq

hisobotlarida to‘liq aks ettirilishi ustidan doimiy nazorat o‘rnatilsin.

Bunda, ushbu sohada faoliyat olib borayotgan karerlarning qazib olish hajmlarini doimiy tahlil qilib borish hamda zarur hollarda qazib olish hajmlarini aniqlashda mahalliy budjetning qo‘shimcha manbalari hisobidan “marksheydrlik” xizmatlaridan foydalanish lozimligi alohida belgilab qo‘yilsin.

13. Majburiy ijro byurosi Qashqadaryo viloyat boshqarmasi (O.Payonov), viloyat davlat soliq boshqarmasi (Sh.Nisbatxonov) bilan hamkorlikda soliqlar va boshqa majburiy to‘lovlar bo‘yicha mavjud soliq qarzdorliklarini budjetga undirish yuzasidan tegishli choralar ko‘rib borsin hamda choraklar yakuni bilan soliq qarzdorliklarining chorak boshiga nisbatan kamayib borishi bo‘yicha barcha kompleks chora-tadbirlar ko‘rish vazifasi yuklatilsin.

14. Mahalla va nuroniylar boshqarmasi (Sh.Tursunov), tuman hokimligi jismoniy shaxslarning yer va mol-mulk soliqlari bo‘yicha joriy hisoblangan soliqlarni hamda ushbu soliqlardan mavjud soliq qarzdorliklarini undirish yuzasidan soliq organlariga amaliy yordam ko‘rsatsin.

15. Davlat aktivlarini boshqarish agentligi viloyat hududiy boshqarmasi (Sh.Bo‘riyev), Bo‘sh turgan obektlaridan samarali foydalanishni tashkil etish markazining Qashqadaryo viloyat hududiy boshqarmasi (I. Jo‘rayev) bilan birgalikda:

bo‘sh turgan davlat mulki obektlarini aniqlash bo‘yicha xatlov ishlarini samarali tashkil etish;

xatlov natijalariga ko‘ra viloyatda mavjud bo‘sh turgan davlat mulki obyektlari ro‘yxatini shakllantirish;

shakllantirilgan ro‘yxatga asosan bo‘sh turgan davlat mulki obektlarini ijaraga berish yoki sotish bo‘yicha tegishli takliflar tayyorlash;

bo‘sh turgan davlat mulki obektlarini ijaraga berish yoki sotish bo‘yicha ijtimoiy tarmoqlar va ommaviy axborot vositalarida roliklar va video-materiallar tayyorlash;

xususiylashtirilishi mo‘ljallangan bo‘sh turgan davlat mulki obektlarini «e-ijro auksion» maydonchasi orqali sotish ishlarini tashkillashtirish vazifasi yuklatilsin.

16. Davlat aktivlarini boshqarish agentligi viloyat hududiy boshqarmasi

(Sh.Bo‘riyev), viloyat davlat soliq boshqarmasi (Sh.Nisbatxonov), viloyat moliya bosh boshqarmasi (F.Yusupov) davlat korxonalari hamda ustav kapitalida 50 foiz va undan ortiq davlat ulushi mavjud bo‘lgan yuridik shaxslar tomonidan 2022-yilning 1-iyuliga qadar 2021-yil yakunlari bo‘yicha o‘z sof foydasining 50 foizidan kam bo‘lmagan miqdoridagi ajratmalar va davlat ulushi bo‘yicha dividendlarni 2022-yilning 1-sentabridan kechiktirmay tegishli darajadagi budjetlarga o‘tkazilishini ta‘minlasin.

17. Monopoliyaga qarshi ko‘rashish qo‘mitasi Qashqadaryo viloyati hududiy boshqarmasi (S.Sodiqov), tuman hokimligi bilan birgalikda tashqi reklama obektlarini to‘liq xatlovdan o‘tkazgan holda, ushbu tashqi reklama obektlari bo‘yicha shartnomalar tuzish choralarini ko‘rsin hamda ushbu shartnomalar bo‘yicha yig‘imlarni budjetga to‘lanishi ustidan doimiy nazorat o‘rnatsin.

18. Qashqadaryo irrigatsiya tizimlari havza boshqarmasi (I.Qurbonov) va viloyat davlat soliq boshqarmasi (Sh.Nisbatxonov), tuman hokimligi bilan birgalikda viloyatda sug‘orishga sarflanayotgan suv hajmlari bo‘yicha aniq hisob-kitoblar yuritgan holda mazkur iste‘mol hajmlari bo‘yicha suv resurslaridan foydalanganlik uchun soliqlarni to‘liq hisoblanishini hamda moliya yili yakuniga qadar mahalliy budjetlarga to‘liq undirib olish vazifasi yuklatilsin.

Bunda, qishoq xo‘jaligi korxonalari tomonidan iste‘mol qilinayotgan suv resuslari hajmlari va ushbu hajmlar bo‘yicha hisoblanayotgan suv soliqlari bo‘yicha doimiy tahlillar o‘tkazishga alohida e‘tibor qaratilsin.

19. Viloyat ichki ishlar boshqarmasi (Sh.Satvoldiyev), viloyat yo‘l harakati xavfsizligi boshqarmasi (A.Sadirov) hisoblangan boj, jarima va yig‘imlarni o‘z vaqtida o‘rnatilgan tartibda budjetga undirish choralarini ko‘rib borsin.

20. Davlat Moliyaviy nazorati viloyat boshqarmasi (N.Rahmatov), Xalq ta‘limi, maktabgacha ta‘lim va Sog‘liqni saqlash bosh boshqarmalarining Ichki audit xizmatlari bilan birgalikda:

budjet intizomiga qat‘iy rioya etilishi ustidan doimiy monitoring ishlari kuchaytirsin;

budjet intizomini buzish holatlari bo‘yicha har oy yakuni bilan Kengashga axborot kiritib borsin;

o‘tkazilgan nazorat tadbirlari yakuni bo‘yicha kamomad va noqonuniy o‘zlashtirishga yo‘l qo‘ygan soha rahbarlarining hisoboti har chorakda eshitib

borilsin.

21. Kengashning mahalliy budjet, iqtisodiy islohotlarni amalga oshirish, investitsiyalar va tadbirkorlikni rivojlantirish masalalari bo'yicha doimiy komissiyasi:

mahalliy budjetning qo'shimcha manbalaridan foydalanish to'g'risidagi hokimlik tomonidan taqdim etilgan takliflari asosida budjet qonunchiligiga to'liq rioya etilgan holda Kengash qaror loyihasini ishlab chiqilishiga;

Kengash qarori asosida mahalliy budjetning qo'shimcha manbalari hisobidan ajratilgan mablag'larni samarali va maqsadli foydalanishi ustidan nazorat o'rnatishga va natijalari bo'yicha tavsiyalar berishga monitoring qilishga;

Mahalliy budjet xarajatlarining qonunchilikda belgilangan qismining jamoatchilik fikri asosida shakllantirilgan tadbirlarni moliyalashtirishga yo'naltirilishida ishtirok etadi va ushbu mablag'larning maqsadli sarflanishi ustidan nazoratni amalga oshirishga mas'ul etib belgilansin.

22. Ko'kdala tuman hokimligi:

Tuman budjeti jami xarajatlarining 5 foizi hamda shakllangan qo'shimcha mablag'larining kamida 30 foizini jamoatchilik fikri asosida shakllantiriladigan tadbirlarni moliyalashtirish uchun "Fuqarolar tashabbusi jamg'armasi"ga yo'naltirsin.

Bunda, tuman xalq deputatlari, Yoshlar ishlar agentligi, tuman hokimligi huzuridagi Jamoatchilik kengashlari hamda yangi joriy etilgan hokim yordamchilari budjet jarayonida fuqarolarning faol ishtirokini ta'minlash maqsadida aholiga keng targ'ibot-tashviqot ishlarini olib borishga mas'ul etib belgilansin;

mahalliy budjetlarning qo'shimcha manbalari hisobidan xarid qilingan tovarlar va xizmatlar, qurilish, rekonstruksiya qilish va ta'mirlash ishlari olib borilayotgan ob'ektlar ro'yxati, shuningdek qurilish-ta'mirlash ishlarining moliyalashtirilishi to'g'risidagi ma'lumotlar har chorak yakunlariga ko'ra, keyingi chorak birinchi oyining 10 sanasiga qadar majburiy tartibda tegishli hokimlik rasmiy veb-saytlariga joylashtirib borilsin.

23. Viloyat hokimining birinchi o'rinbosari (A.Qodirov), xalq deputatlari viloyati Kengashi kotibiyati, tuman hokimligi, tegishli boshqarma boshliqlari:

mahalliy budjet daromad va xarajatlarining prognoz ko'rsatkichlari bajarilishi hamda soliq bazasini kengaytirish yuzasidan ko'rilgan chora-tadbirlar;

ajratilgan budjet mablag'laridan maqsadli va samarali foydalanishi yuzasidan erishilgan natijalar bo'yicha Kengashga bir chorakda kamida bir marotaba hisobot kiritib borsin.

24. Viloyat hokimligi Qonunda belgilangan ayrim soliqlar va to'lov stavkalari, soliq solish tartiblari hamda boshqa ma'lumotlarni ommaviy axborot vositalarida yoritilishini ta'minlasin.

25. Mazkur qaror "Qashqadaryo" gazetalarida rasmiy e'lon qilinsin hamda viloyat hokimligining rasmiy veb-saytiga joylashtirilsin.

26. Ushbu qaror rasmiy e'lon qilingan kundan boshlab kuchga kiradi.

27. Mazkur qaror bajarilishini nazorat qilish xalq deputatlari viloyat Kengashining Mahalliy budjetni shakllantirish va ijro etish, iqtisodiy islohotlarni amalga oshirish va tadbirkorlikni rivojlantirish masalalari doimiy komissiyasi va viloyat hokimligi zimmasiga yuklatilsin.

Kengash raisi



M.Azimov

Xalq deputatlari Qashqadaryo viloyat
Kengashining
2022 yil 2 iyundagi
VI-47-103-4-0-K/22-son qaroriga
1-ilova

**Ko'kdala tuman mahalliy budjetining
2022 yil daromadlari va xarajatlariing chegaraviy hajmi**

ming so'mda

Hudud nomi	Daromad *	Xarajat
Ko'kdala tumani	39 515 000.0	72 376 920.0

** mobil aloqa xizmatlari uchun, alkogol maxsulotlari, shu jumladan pivo va tamaki mahsulotlari uchun aksiz solig'idan tushumlar bo'yicha o'tkazib beriladigan daromadlar bilan birgalikda.*

Xalq deputatlari Qashqadaryo viloyat Kengashining
2022 yil 2 iyundagi
VI-47-103-4-0-K/22-son qaroriga
2-ilova

Umumdavlat soliqlaridan Ko'kdala tuman mahalliy budjetiga 2022-yildagi ajratmalari me'yorlari

foiz hisobida

T/P	Шахар ва туманлар номи	Yuridik shaxslardan olinadigan foyda solig'i	Aylanmadan olinadigan soliq	Jismoniy shaxslardan olinadigan daromad solig'i	Yakka tartibdagi tadbirkorlar uchun jismoniy shaxslardan olinadigan daromad solig'i	Yakuniy iste'molchilarga benzol, dizel e'qilg'isi va gaz realizatsiya qilishdagi aksiz solig'i	Yuridik shaxslarning mol-mulkiga solinadigan soliq	Jismoniy shaxslarning mol-mulkiga solinadigan soliq	Yuridik shaxslar yer solig'i	Jismoniy shaxslardan olinadigan yer solig'i
1	Ko'kdala tumani	0	100	100	100	100	100	100	100	100

T/R	Shaxar va tumanlar nomi	Yer qa'ridan foydalanganlik uchun soliq (noruda materiallari)	Suv resurslaridan foydalanganlik uchun soliq	Davlat boji	Jarimalar	Yig'imlar	Davlat unitar korxonalarining sof foydasidan ajratma	Davlat mulki bo'yicha ijara to'lovlari	Xususiy tashkilotlar	Boshqalar
1	Ko'kdala tumani	100	100	0	0	100	100	100	100	0

Xalq deputatlari Qashqadaryo viloyat
Kengashining
2022 yil 2 iyundagi
VI-47-103-4-0-K/22-son qaroriga
3-ilova

**Ko'kdala tuman mahalliy budjetining 2022-yilgi yuqori budjetdan ajratiladigan
tartibga soluvchi budjetlararo transfertlar miqdorlari**

ming so'mda

Hudud nomi	Tartibga soluvchi transfert miqdori
Ko'kdala tumani	32 861 920.0

Xalq deputatlari Qashqadaryo viloyat
Kengashining
2022 yil 2 iyundagi
VI-47-103-4-0-K/22-son qaroriga
4-ilova

**Ko'kdala tuman mahalliy budjetida
2022 yilda yo'l qo'yiladigan eng kam mablag'lar miqdori**

Hudud nomi	miqdor (ming so'mda)
Ko'kdala tumani	273 477.0